

Baldar-ip toqunera Ragnarok-lu

Balder-ip sinnattugai

Qangarsuarooruna Asgård-ip guutii ataatsimeersuarnermi naapeqatigiissimasut. Nipitoorujussuarmik imminnullu kipittajoorlutik oqalupput. “Qanoq paasisariaqarpa?” Thor torlulaarpoq uninngaveqarani kaattani kaavitiitigalugu, innaallagissallu sumut tamaanga tammikalatsillugit. “Ajourpoq, ajorluinnarpoq,” Heimdal pilerpoq qarlortaanni qajassuullugu attuualaajutigalugu. Isai imaqanngitsutut ippit soorlulu ungasiinnarsuarmut isigisaqartutut isikkoqarlutik. Freja pinnersoq ileqilariaataa nipituumik anersaamivoq qitsorujussuarlu saniminiittoq assaminik tagiarlugu. “Nipangeritsi!” nipi piginnaaneqarpalaarluni tutsiuppoq. Tassa Frigg-ip, Asgård-mi kunngiusup nuliata nipaa. “Ernera Balder, sinnattukkatit oqaluttuareqqikkitt, tusaqqerusuppagut”. Guutit nillernatik guuti inuusuttoq pinnersoq qiviarpaat.

Balder-i arriitsumik nikuippoq. “Sinnattunni”, isussulluni oqarpoq, “inissaarsuarmiippunga taartuinnarsuarmi. Sunamininnguarluunniit takusinnaanagu. Nillialerpungalu isumaqaramami tappiitsunngorsimallunga”. Qatanngutini Høder utoqqatserpasilluni qissimippaa, taannali guuti tappiitsoq nillinngilaq. “Taava tassangaannaq naneruaq ikinneqarpoq,” Balderip oqaatsini ingerlateqqippai. “Takusinnaalerparalu nerrivik nalissaqanngiivissoq, imertarfinnik guultimik seqinnarimmik sanaanik nerriviliorneqarsimasoq. Soorluuna tikeraamik ataqqinartumik utaqqisoqartoq. Kisianna taava...” Balder unikaallappoq. “...taava arnaq takulerpara. Talini siaarlugit tikilluaqquaanga, kisianni kiinaata affaa toqusup kiinaatut aseroriartortutut isikkoqarluni. Aap... paasiinnarpara toqusimallunga, tassami taanna uannut tikilluaqqusisoq tassaammat toqusut inaata guutia arnaq,” nipaatsumik naggasiivoq

Guutit imminnut torlulaattaallattaarlutik oqaloqqilerput. Inersuarmi tunorlersaalluni Odin-i issiavissaarsuarmini issiavoq. Odin-i, guutit kunngiat, kisimi oqaaseqarsimanngilaq, kisianni taassuma kisiivimmi paasisimavaa Balder-ip sinnattungaa qanorpiaq paasisariaqartoq.

Qangarsuarooq Odin-ip isimi aappaa akigalugu silarsuarmi ilisimassuseq tamaat pisimavaa, kingornalu ullut qulingiluat orpimmi nivigasimavoq, angakkuarsinnaaneq allannerillu ujaqqamut kigartukkat atuarsinnaalernissai ilinniarniarlugit. Kisianni ilisimassuseq angakkuarnerlu ukununnga pisimasunut sanilliullugu suunnngilluinnarput: tassami taamaalluni siulittuisartoq arnaq utoqqaq pulaarsimavaa toqusunillu makitillugu. Odin-ip gultinik pinnersaatinillu tunisimavaa, taassumalu taakkununnga taarsiullugu Odin silarsuup aserornissaanik oqaluttuussimavaa, Taamanimiilli siulittuisartup

siulittuina Odin-ip ilisimalluinnarsimavaa, tamannalu pissutigalugu nalusimangilaa Balder-ip sinnattugai suut tamarmik aserorluinnarfissaannut - Ragnarok-imut- aallaqqaataannaasussaasut.

Maannalu Odin qalugiusarujussuani seeqquminut ilillugu issiavoq. Guutit suaartaataa issiasut isiginnaarpei. Taakkulu akornanni Loke takoriasaarpa savissuani atorlugu kukini salerusaarai. Sukkut tamaana qummut qiviartarpoq, Balderi qissimillattaajutaa. taanali affarmik guuti peqqusersooq kukini salittuusaaajutai issiaannarpoq.

Odin-ip qalugiusani arriitsunnguamik kivilaarpa. “Ataasiaannarlunga miloriaruma”, eqqarsarpoq, “Loke natermi toqungariissangaluarpoq”.. Qalugiusani kiveqqippaa. “Immaqa uffa inuunermi atugassat aalajangeriigaagaluit allanngortinneqarsinnaasut? Taannamiuna guutit kunngiat!” Odin-ip tulugaatai marluk nipituumik qarlulerput sulutillu isaqqilatillugit.. Odin miloriarnissaminut piareerpoq, tassanngaaneli Frejap qitsuutaa pangalilluni takkuteriasaarpoq, nuersagassaq imusaq malersukkani nassarlugu, qiimalluni miaartuutaa. Odin-ip imusaq isiginnaalerpa. Soorluuna alliantortoq. Taava anersaaruluppoq qalugiusanilu apparlugu. “Uma sunaana eqqarsaatigalugu taamaaliortoq? Kialluunniit atugassat aalajangeriikkat allanngortissinnaangilaai ujalussiarlu norninit qissiagaq.”

Tassami silarsuup qeqqarpiaani silarsuup orpiata Ask Yggdrasil-ip ataani qatanngutigii arnat utoqqaat pingasut najugaqarsimapput. Tassa taakku nornit Qanga , Nalerput aammalu Siunissaq. Inummik, guutimik imaluunniit allamik uumasumik inuusoqartorlu ujalussiamik qissisarput. Silissinnaavoq amitsuusinnaallunilu. Takisuujusinnaavoq naatsuusinnaallunilu. Nuannaarnersuarmik aliasunnersuarmilluunniit imaqarsinnaalluni. Ujalussiap aamma aalajangertarpa inuuneq takissanersaq takissanngitsorluunniit. Allaat Odin-ip qatanngutaasalu, inorujussuup Ymerip timaanit silarsualiaat, inuunerup ujalussiaanik, nornit pingasut sanaavinnik, peqarput.

Taamaamat Odin-i nikallungalluni qungujulaarlunili issiavissuarminut ingeqqippooq guutit assortuunnerat tusarnaajutaa. Mannali nalunnigilluariinngaa eqqarsaataaniippoq: Silarsuup naggatissaa aallartereerpoq.

Balder-ip toqunera

Frigg-ip Guutit oqqannerat unitsippaa. “ Immaqamiuna Balder-ip sinnattugaa aarlerisaarutitut paasisariaqartoq,” oqarpoq. “Toqumik amiilaarnartumik aarlerisaarut.” Ernumarpasilluni erni qiviarpaa. “Kisianni taammaattoqarnissaa perusunngeqaara, aatsaammi Balderi toqusinnaavoq kialluunniit suulluunniit ajoquserusussimappagu. Taamaamat silarsuarmi kikkugaluartulluunniit suungaluartulluunniillu qinnuigaakka Balder-ip ajortumik pineqanngisaannarnissaanit neriorsueqqullugit.”

Tassaana Balder-i pinnerujussuaannarani aamma ajunngitsuusimasoq. Taamaamat kikkulluunniit nalunngisaasa اساسimaqaat. Taamaallaat Loke-p nuannarisimanngilluinnarpaa pikkunaagalugu. Soorumami tamanna kikkunnulluuniit oqaatigisimanngisaannarpaa.

Frigg-i isumalluangaarluni silarsuarmut aallarpoq, neriorsuutinik katersuiartorluni. Inuit, inuaqqat inorujussuillu ingerlaannaq Balderimut ajortuliorusunngisaannarumallutik neriorsuipput. Ujaqqat saffiugassallu aamma neriorsuipput. Uumasut naasullu neriorsueqataapput. Allaat silarsuarmi nappaatit sooranarnersaat ulorianarnerssaallu neriorsuipput Balder-i ajortuliorfiginngisaannassallugu. Naggataatigut silarsuaq tamaat kaajallareerlugu Frigg-ip orpitoqaq manngertoq kiseqqinnaat amigaatigilerpaa. Orpiup Balder-i nuannarisimaqaa, taamaammallu ingerlaannarluni Frigg-i neriorsuummik tunivaa. Frigg-i eqqissiummerluni anersaamivoq. Maannakkumiit saviit saviminermi sanaat Balder-i susinnaajunnaarpaat, anaatallu qisummik ujarammilluunniuu sanaat aamma. Kikkut suullu tamaqqinnaamik ilumoorutamik neriorsuisimapput. Frigg-i qummut qiviarpooq. Pavanerujuk orpitoqqami manngertumi naasuaramininnguaq mistelten-i naasimavoq. Taanna Frigg-ip aperinngitsoorsimavaa. Qummut majuarluni aperiartussanerppaa? “Naamik,” Frigg-i eqqarsarpoq. “Naasoq mikingaarami pingaaruteqanngingaaramilu Balder-i susinnaangilaa.”

Unnuk taanna festernersuaqarpoq. Guutit nerillutillu imerput - qaavatigullu imeqqilaarlutik. Tamarmimmi nalliuttorsiuutigerusukkamikku Baldarimut siorusaarinerit piliusunngorsinnaajunnaarneri. “Balder-i kialluunnit ajortumik perusunngilaa,” Heimdal paamaartumik nipilerluni oqarpoq. “Qatanngutiga inuummersorli,” Thor torlulaarpoq kaatanilu kaaviterujussuaarlugu. Arraa susoqalersoruna? Thor-ip kaatani iperartoorppaa, kaatarlu sukkasoorujussuarmik Balderip tungaanut aallarpoq. Kisianni tuia anguliivillugulu kaataq tassanngaannaq uneriasaarpoq, natermullu nakkarluni. Thor-ip qaatusimasaqanngitsutut nakkuppaa, guutillu avaalaartuinnanngorlutik naammattumik illaatigaat. Kinguninngua pinnguaammik quianartumik isumassarsipput. Ataasiakkaarlutik suut tamaasa milluutigalugit Balder-i milluulerppaat, milluutaalli Balder-i anngunngitsiarlugu tassanngaannaq unittarput. Tassamiuna suut tamarmik neriorsuinikuugamik Balder-i ajortumik piniannngisaannassallugu.

Loke kiseqqinnaami nuannisartunut ilaannngilaq. Teqqeqqumi ingilluni isumaluppoq. Isumassarseriataarporli. Loke-una immikkut ittumik piginnaanilik, tassami imminut uumasunngortissinnaavoq, uumasooq sunnaagaluarpalluunnit. Bing! Bang! Bong! Aatsaannguaq Loke-p issiaffiani massakkut arnaq utoqqaq qatiggersimasooq nueriataarpoq. Tassamiuna Loke ilisarnarunnaarsarluni utoqqaasartoq. Tussapilluni Frigg-i ornippaa. “Uuma ajoq!” Loke arnaq utoqqatut nipilerluni oqarpoq. “Balderi

toqqunniarsarivaat.” Balderip tungaanut tikkuarpoq, tikkuagaalu ulimaassuaq issikkami saanut tummat illariarujussuarpoq. Frigg-i qungujuppoq. “Ernera ajugaaffigineqarsinnaanngilaq,” usorsisimaarluni oqarpoq. “Suungaluarunilluunniit ernerajortumik pisinnaanngilaat.” “Suungaluarunilluunniit?” arnaq utoqqaq isussulluni pakatsisimarpalulluni oqarpoq. “Ulimaap ujaqqamik sanaap susinnaannginnamiuk?” “Nappaassuimmi?” “Amaqquimmi qaasuttut?” “Skvalderkål?” Arnap utoqqaq apeqqutai tamaasa Frigg-ip ileqimisaartorluni naaggaarpai. “Suut tamarmik silarsuarmiut neriorsuinikuupput ajortuliorniaratik, taamaallaat...” Frigg nipangeriasaarpoq. “Taamaallaat suna?” Arnap utoqqaq qummut Frigg-i qiviarpa. “Aa..usimi,” Frigg oqarpoq. “Taamaallaat naasoq mikisunnguaq, taannajaqqammi Balder-i susinnaanngilaa.” Arnaq utoqqaq peqqusersusaarpaluttumik qungujuppoq, qimagullunilu.

Loke tuaviinnaq ingerlavoq. Imaaliallaannaq orpitoqqaq naasorlu nanivaai, naasuarannguarlu qarsuaranngualiaraa. Taamaalereerami festertunut uterpoq. Guutit pinnguarnertik suli ingerlappaat. Ujaqqat, panat, qarsut Balderup tungaanut sukkaosorsuarmik ingerlaartuaraluartut suulluunniit eqqorsinnaanngilaat. Loke-p takuvaa Høder-i kiserrammi issialluni imertoq. Tapiittuugamimi pinnguarnertit ilaasinnaanngilaq. “Høder-i Ilaarusunnginnavit?” Loke peqqusersoorpasilluni aperivoq. “Qaagit. Aajuna pisisseq qarsorlu. Umernialeruit ikiussavakkit.” Høder-i tupaallappoq. Loke ikiuiumattuujunngilaq, pinnguaqatoorusupporli.

Høder-i nikuippoq. Pisisseq kivippaa Loke-llu umernialermat ikiorpaa. Taamaalinerani Odin-i issiavissaarsuarmiini issiavoq, pisut isiginnaajutigalugit. Høder-i piseriartorlu sikorniinnarpoq. Taava siutinngunartupilussuarmik nilliarpaluttoqarpoq. Balder-ip uummataa qarsumik eqqorreqarmat, Balder-i toqunngarmi uppippoq.

Ragnarok-i

Balder-i toqulluni uppittorlu, Loke arpaannaq qimaavoq. Høder-ip pisisseq tigummiarlugu nikorfaannarpoq, susoqarsimanersorlu paasisinnaanngilaa. Frigg-i aliasungarluni nillivoq, guutillu tamarmik ernumatsassimarpasilllutik. Taava Frigg-i sapiillisaarluni oqarpoq. “Naamik taamaattoqassanngilaq,” kamappasitsumik nipeqarluni oqarpoq. “Hel-i toqusut inaata dronning-ia oqarfigissavarput Balder-i toqusunit utertissagaa.”

Guutit inuusuttut ilaasa Odin-ip hiistia attartorpaa. Arfineq pingasunik nioqarami sukkaosorujussuarmik pangalissinnaavoq. Guuti inuusuttoq ingerlaannarluni pangaliinnaq aallarpoq, aatsaallu toqusut najugaata isertarfianut apuukkamik unippoq. Hiistimiit aqqarpoq matukkullu kasuttorluni. Tassami Frigg-i sinnerlugu Hel-i siorasaarniarpaa, immaqaluunniimmi qinnuigiinnassavaa akilerluguluunniit? Kisianni

ilimagisaminnit Balderip aniguisinnissaa ajornannginnerujussuuvoq.

“Soorunami Balder-i utersinnaavoq,” Hel guutimut inuusuttumut oqarpoq. Isigiitigalugulu qanermi sinaa alutturpaa. Tunuani, piviuungitsutut isikkoqarluni, nerriviup pinnesorujussuarmik nerriviliorneqarsimasup eqqaani Balderi issiavoq. Kisianni nerinngilaq. “Oqarputit Balderi kikkunnik sunillu tamanik asaneqartorujussuusoq.” Qullugiaq uluaminiik nusuppaa iillugulu. “Aamma toqunera taamarsuaq qissatigineqarsinnaappat Balderi utersinnaalissaaq.” Hel-i nipipilummik nipeqarluni illalaarpoq, guutilu inuusuttoq tuaviinnaq toqusut inaanniit qimaavoq, inuusut silarsuaannukarluni.

Soorunami Balderi qissatigineqarpoq. Uumasut naasullu. Inuit inorujussuillu. Tamarmik qissatigaat. Kisianni naggataatigut guutip inuusuttup arnaq inorujussuaq utoqqaq paqqersimasumik kiinalik naapippa. “Sooq aamma Balder-i qissatigissavara?” sukangasumik oqarpoq. “Kinaasorluunniit naluara, ilisarisimagaluarukkuluunniit ernikka marluk toqusuniittut qissatigerusunneruakka”. Taama oqareerami nipitoorsuarmik illiarujussuarpoq. Tassaagamimi Loke ilisarnarunnaarsarluni arnaq utoqqartut atisalersorsimasoq.

Guuti inuusuttoq pakatsisimaarluni Balder-i qimaannarlugu Asgãrdimut angerlarpoq, guutillu kamangaarput. Hel-i kamaatigaat, kisianni Loke kamaatigineruvaat. Tassami paasisimavaat Loke-p, naasuaqqamik paasiniaanerminut atatillugu, Frigg-i ussassaarlugu oqaatigiumanngisaraluinit oqartissimavaa. Taamaalioreeramilu Høder-i aamma salloqittarsimavaa. Aammalu eqqoriarsimavaat arnaq utoqqaq inorujussuaq tassaasimasoq taanna salloqittaasartorsuaq Loke.

Taamaammat guutit Loke ujarlugu aallarput. Unnuaq ullorlu malersorpaat, ingerlaarnerminnilu qanoq pillarneqarnissaa qanorlu akiniaanissartik pilersaarusiortaat

Taamaallutimmi Loke nanivaat. Sunaaffa imminut eqalunngortissimasoq, koorujussuullu naqqani toqqorluni. Thor-illi ilisarisimavaa assaannarminillu piasisimallugu.

Loke pillarneqarpoq. Pillaataat amiilaarnagaarmat nipituumik oqaatigineqarsinnaanngilarluunniit. Naggataatigulli qaarsummi kalunnilerlugu inissippaat, guutillu nuannaarput pillarneqarneralu nipituumik illapalaatigalugu.

Odin-i kisimi nuannaartunut ilaannngilaq. Nalunnginnamiummi Loke-p pillarneqarnera silarsuup naggatissaata aallaqqaatigiinnarmagu. “Suummaa taassuma siulittuisartup siulittuutigigai?” eqqarsarpoq. “Siullermik Balderip

sinnattugai, taavalu toqunera, naggataatigullu Lokep pillarneqarnera. Tamakkulu pereerpata silarsuaq arriitsunnguamik aseroriartulissaaq.” Odin anersaammivoq. Inuusut salluliortassapput, tillittarlutik toqutsisarlutillu. Midgård-ip qullugiarsuata nunarsuaq arriitsunnguamik eqitaarlugu sukakkiartuaassavaa, qaarsoq qaqqallu qupisarlugit. Taamaattoqareerpat ukiorsuaq sooranartorsuaq Fimbul-i takkutissaaq. Ukiut pingasut aasaqaranilu seqineqassanngilaq, ississuaq kisimi. Taava Loke amarorsuarlu pissaanilissuaq Fenris-i iperagaassapput, silarsuarmilu ikualanersuaqalissaaq sorsunnersuaqalerlunilu. Inorujussuit guutillu imminnut sorsuutissapput. Sorsunnersuarmilu Odin-i toqutaassaaq. Naggataatigut nunarsuaq immamut kiviartulissaaq, sunalu tamarmi aserussaaq nungullunilu. Puf. Soorlu inneq supuneqaannartoq.

Odin-ip Loke, qilersorneqarsimalluni qaarusummi nalasoq, qissimippaa. Taava kaajallappoq anillunilu. Illussaarsuarminut angerlarpoq, Ragnarok utaqqiartorlugu.